

AKASHVANI (Kolkata)
Regional News Unit

Date : 31-07-24

Desk in Charge :

Time : 7-50 P.M

Compiling :

Morning /Day /Evening National/ Regional/ General

Opening Announcement – আকাশবাণী / খবর পড়ছি –

বিশেষ বিশেষ খবর –

১/ কেন্দ্রের নতুন তিন ফৌজদারি আইনে প্রয়োজনীয় সংশোধনের ক্ষমতা রাজ্য সরকারের আছে বলে মন্ত্রী চন্দ্রিমা ভট্টাচার্য জানিয়েছেন।

অন্যদিকে, বিজেপির দাবী, রাজনৈতিক স্বার্থ চরিতার্থ করতেই এই তিন আইন নিয়ে বিধানসভায় প্রস্তাব এনেছে রাজ্য সরকার।

২/ মন্ত্রী ফিরহাদ হাকিমের বিরুদ্ধে সাম্প্রদায়িক মন্তব্যের অভিযোগকে কেন্দ্র করে সরকার ও বিরোধী পক্ষের বাদানুবাদে আজ রাজ্য বিধানসভার অধিবেশন উত্তপ্ত হয়ে ওঠে।

বিজেপি পরিষদীয় দল জানিয়েছে, ফিরহাদ হাকিম তাঁর মন্তব্য প্রত্যাহার না করা পর্যন্ত বিধানসভায় তাঁকে বয়কট করবে দল।

৩/ ঝাড়খন্ডের চক্রধরপুর ডিভিশনে হাওড়া-CSMT মুম্বাই মেলের দুর্ঘটনার পর আজ রাতে ও আগামীকাল ভোরে দুটি স্পেশাল ট্রেন চালানো হবে।

৪/ ঘূর্ণাবর্ত এবং মৌসুমী অক্ষরেখার প্রভাবে কলকাতা সহ দক্ষিণবঙ্গের বিভিন্ন জেলায় বৃষ্টি হচ্ছে।

৫/ ইস্টবেঙ্গল ক্লাবের প্রতিষ্ঠা দিবসে আগামীকাল সৌরভ গাঙ্গুলীকে 'ভারত গৌরব' সম্মান প্রদান করবে ক্লাব।

কেন্দ্রের নতুন তিন ফৌজদারি আইনে প্রয়োজনীয় সংশোধনের ক্ষমতা রাজ্য সরকারের আছে। রাজ্যের আবেদন মেনে কেন্দ্রীয় সরকার যদি ঐ তিন আইনে সংশোধন না করে, তবে রাজ্য সরকার পদক্ষেপ করতে পারে বলে অর্থমন্ত্রী চন্দ্রিমা ভট্টাচার্য ইঙ্গিত দিয়েছেন।

আইনবিদ, সমাজ কর্মী এবং সাধারণ নাগরিকদের মতামত নিয়ে কেন্দ্রের তিন নতুন ফৌজদারি আইনে প্রয়োজনীয় সংশোধনের দাবিতে রাজ্য বিধানসভায় সরকারপক্ষের আনা প্রস্তাবের ওপর আজ আলোচনার সূচনা হয়। প্রথম দিনের আলোচনায় অংশ নিয়ে চন্দ্রিমা ভট্টাচার্য, তিন নতুন ফৌজদারি আইনকে কালা কানুন আখ্যা দিয়ে বলেন, এই আইন রাজ্যের এজিয়ারে কেন্দ্রের হস্তক্ষেপের পথ প্রশস্ত করার একটি প্রচ্ছন্ন মডেল। দেশের যুক্তরাষ্ট্রীয় কাঠামোকে যা নষ্ট করবে। অর্থমন্ত্রী অভিযোগ করেন; বিরোধীদের সঙ্গে কোনো আলোচনা না করেই ১৪৭ জন সাংসদকে সাসপেন্ড ক'রে গায়ের জোরে কেন্দ্রীয় সরকার এই তিনটি আইন প্রণয়ন করেছে। আইন কমিশনকেও তা পর্যালোচনার জন্য পাঠানো হয়নি। পুরোনো ইন্ডিয়ান পেনাল কোড বা ভারতীয় দণ্ডবিধির অনেক ধারাই হুবহু নতুন আইনে যুক্ত করা হয়েছে। বিরোধী জোটের ছায়া এড়াতে আইন থেকে 'ইন্ডিয়া' শব্দটি মুছে ফেলার জন্যই কেন্দ্রের বিজেপি সরকারের এই উদ্যোগ কিনা, সে প্রশ্ন তোলেন তিনি।

এর আগে প্রস্তাবের উপর আলোচনা সূত্রপাত করে বিজেপির অম্বিকা রায় বলেন, পয়লা জুলাই থেকে দেশে নতুন তিন ফৌজদারি আইন কার্যকর হয়েছে। এর বিরোধিতা করে বিধানসভাতে আগেও একটি প্রস্তাব গ্রহণ করেছে শাসক দল। তারপরও একই বিষয়ে বারবার বিধানসভায় কেন প্রস্তাব পাস করানো হবে, তা নিয়ে তিনি প্রশ্ন তোলেন। একই সুরে বিজেপির মুখ্য সচেতক শংকর ঘোষ বলেন, কেন্দ্রীয় সরকারকে ছোট করতে এবং রাজনৈতিক স্বার্থ চরিতার্থ করতেই বিধানসভায় এই প্রস্তাব আনা হয়েছে।

আগামীকালও বিধানসভায় এই প্রস্তাবের ওপর আলোচনা হবে।

রাজ্যের মন্ত্রী ফিরহাদ হাকিমের বিরুদ্ধে সাম্প্রদায়িক মন্তব্যের অভিযোগে বিজেপি পরিষদীয় দলের তাঁকে বয়কটের সিদ্ধান্তকে কেন্দ্র করে রাজ্য বিধানসভার প্রথমার্ধের অধিবেশন আজ উত্তপ্ত হয়ে ওঠে।

প্রশ্নোত্তর পর্বে ফিরহাদ হাকিম একাধিক বার প্রশ্নের উত্তর দিতে ওঠার সঙ্গে সঙ্গে বিজেপি সদস্যরা সভাকক্ষ থেকে বেরিয়ে যান। শাসক দলের বিধায়করা এর প্রতিবাদ জানালে শুরু হয় দু'পক্ষের বাদানুবাদ। বিজেপির মুখ্য সচেতক শংকর ঘোষ, ফিরহাদ হাকিমের কাছে প্রকাশ্য জনসভায় তাঁর সাম্প্রদায়িক মন্তব্য প্রত্যাহারের অনুরোধ জানান। জবাবে ফিরহাদ হাকিম, বিরোধীদের বিরুদ্ধে পাল্টা সাম্প্রদায়িক রাজনীতির অভিযোগ করেন। তিনি বলেন, ধর্মীয় অনুষ্ঠানে পেশ করা বক্তব্যের সঙ্গে রাজনীতির কোনও সম্পর্ক নেই। বিধানসভাতেও এ'নিয়ে আলোচনা হওয়া উচিত নয়। বিজেপি সাম্প্রদায়িক রাজনীতি করছে, রাজ্যের মানুষ এর জবাব দেবে বলেও মন্তব্য করেন তিনি। অধ্যক্ষ বিমান বন্দ্যোপাধ্যায় বলেন, সদস্যদের এমন আচরণ করা উচিত নয়, যাতে বিধানসভার গরিমা নষ্ট হয়।

এদিকে, বিজেপি পরিষদীয় দল, ফিরহাদ হাকিমকে বয়কটের সিদ্ধান্তে অনড় রয়েছে। বিধানসভার বাইরে সাংবাদিকদের প্রশ্নের উত্তরে দলের মুখ্য সচেতক শংকর ঘোষ জানিয়েছেন, ফিরহাদ হাকিম তার মন্তব্যের জন্য ক্ষমা চেয়ে তা প্রত্যাহার না করা পর্যন্ত পরিষদীয় দল বিধানসভায় তাঁকে বয়কট করবে।

(বাইট- শঙ্কর ঘোষ)

২০২৪-২৫ এর সাধারণ বাজেটে কোনও রাজ্যকে বঞ্চিত করা হয়নি বলে কেন্দ্রীয় অর্থমন্ত্রী নির্মলা সীতারামন সংসদে যে দাবি করেছেন, তার প্রেক্ষিতে তৃনমূল কংগ্রেস রাজ্যকে কোন্ খাতে কত টাকা দেওয়া হয়েছে তা নিয়ে শ্বেতপত্র প্রকাশের দাবি জানিয়েছে।

আজ তৃণমূল ভবনে দলের মুখপাত্র, মন্ত্রিসভার সদস্য চন্দ্রিমা ভট্টাচার্য ও দলের নেতা কুনাল ঘোষ এক যৌথ সাংবাদিক বৈঠকে, রাজ্যকে হাজার হাজার কোটি টাকা দেওয়া হয়েছে বলে কেন্দ্রীয় অর্থমন্ত্রীর বক্তব্যের প্রেক্ষিতে সাংসদ অভিষেক বন্দ্যোপাধ্যায় শ্বেতপত্র প্রকাশের যে দাবি জানিয়েছেন তাকে সমর্থন করেন। একশো দিনের কাজ প্রকল্পে ২০২১ সালের পর থেকে রাজ্যকে কত টাকা দেওয়া হয়েছে তার হিসাব কেন্দ্র দিতে পারলেন না কেন; সেই প্রশ্নও তুলেছেন তাঁরা। শুধু রাজনৈতিক প্রতিহিংসার কারণে বাংলা বঞ্চিত বলে কুনাল ঘোষ অভিযোগ করেন।

কেন্দ্রীয় সরকার এখনো টাকা না দেওয়ায় ‘প্রধানমন্ত্রী মাত্র বন্দনা প্রকল্পে’ রাজ্যের ৩’লক্ষ ১২ হাজারের বেশী প্রসূতির টাকা বকেয়া রয়েছে।

স্বাস্থ্য দপ্তর সূত্রে জানা গেছে, গত বছর মে মাসের পর থেকে এই যোজনা খাতে রাজ্যকে কোনো টাকা দেয়নি কেন্দ্র।

উল্লেখ্য, মা ও শিশুর স্বাস্থ্য-সুরক্ষায় ২০১৭ সালে এই প্রকল্প চালু হয়।

বিভিন্ন জেলায় স্থানীয়দের বাধায় জমি জটে আটকে থাকা গ্যাস পাইপ লাইনের কাজ দ্রুত শেষ করার জন্যে গেইল, রাজ্য সরকারের কাছে সহায়তা চেয়েছে। সংস্থার চেয়ারম্যান সন্দীপ গুপ্তা নবান্নে মুখ্যসচিব ভগবতী প্রসাদ গোপালিকার সঙ্গে দেখা করে, পূর্ব মেদিনীপুর, হুগলি ও পূর্ব বর্ধমানে স্থানীয়দের তরফে প্রকল্পের কাজ করতে বাধা দেওয়ার অভিযোগ জানান বলে সূত্রের খবর। এরপরেই সমস্যা দ্রুত মেটানোর জন্যে মুখ্যসচিব ফোন করে জেলা প্রশাসনকে নির্দেশ দেন।

ঝাড়খন্ডের চক্রধরপুর ডিভিশনে হাওড়া-CSMT মুম্বাই মেলের গতকালের দুর্ঘটনার পর বিশেষ ট্রেন চালাবে রেল। আজ রাত সাড়ে ১২ টায় 02768 সাঁতরাগাছি-Hazur Sahib Nanded স্পেশাল, সাঁতরাগাছি থেকে ছাড়বে।

অন্যদিকে, 02906 শালিমার-Okha স্পেশাল শালিমার থেকে ছাড়বে ভোর পাঁচটায়।

লাইনচ্যুত কামরাগুলি সরিয়ে ওই সেকশনের থার্ড লাইন আজকেই চালু করা হবে বলে দক্ষিণপূর্ব রেলের এক মুখপাত্র জানিয়েছেন। আগামীকালের মধ্যে পরিষেবা স্বাভাবিক হবে বলে আশা করা যায়।

দুর্ঘটনার জেরে আজ বাতিল হয়েছে চক্রধরপুর- রাউরকেলা স্পেশাল, সাঁতরাগাছি-নান্দেদ এক্সপ্রেস, তিতলাগড়-হাওড়া এক্সপ্রেস সহ বেশ কিছু ট্রেন।

আগামীকাল'ও আদ্রা ডিভিশনের ১১ টি ট্রেন বাতিল থাকছে বলে খবর। এর মধ্যে রয়েছে, চক্রধরপুর-গোমো এক্সপ্রেস, ঝাড়গ্রাম-পুরুলিয়া মেমু, হাতিয়া-টাটা, বরকাখানা-আদ্রার মত গুরুত্বপূর্ণ ট্রেন।

উত্তরবঙ্গে রাঙ্গাপানি স্টেশনের কাছে কাঞ্চনজঙ্ঘা এক্সপ্রেস দুর্ঘটনার দেড় মাসের মধ্যে ঐ এলাকাতেই বেলাইন হলো তেলের ট্যাংকার বোঝাই একটি মালগাড়ি। আজ বেলা পৌনে বারোটা নাগাদ নুমালিগড় রিফাইনারিতে ঢোকান মুখে লাইনচ্যুত হয় মালগাড়িটির দুটি ওয়াগন। খবর পেয়ে সঙ্গে রেল কর্মী ও পুলিশ ঘটনাস্থলে পৌঁছে ওয়াগন দুটিকে লাইনে তোলার কাজ শুরু করেন। ঘন্টা খানেক পর স্বাভাবিক হয় ট্রেন চলাচল।

মুখ্যমন্ত্রী মমতা ব্যানার্জি, রাঙ্গাপানিতে আজকের মালগাড়ি দুর্ঘটনায় গভীর উদ্বেগ প্রকাশ করেছেন। এক্স হ্যাণ্ডেলে তিনি বলেছেন, যা হচ্ছে তা নিয়ে তিনি অত্যন্ত উদ্বেগ। কারণ মাত্র ছ'সপ্তাহ আগে একই জায়গায় মর্মান্তিক ট্রেন দুর্ঘটনা ঘটেছিল।

ভোরের শিয়ালদামুখী ট্রেন নির্ধারিত সময়ের চেয়ে প্রতিদিন দেরিতে ছাড়ার প্রতিবাদে ডায়মন্ড হারবার স্টেশনে যাত্রী বিক্ষোভ ও অবরোধের জেরে আজ পাঁচ ঘন্টার বেশী ট্রেন পরিষেবা বন্ধ থাকে। ভোগান্তির শিকার হন অসংখ্য যাত্রী।

জিআরপি, আর পি এফ ও পুলিশের হস্তক্ষেপে সকাল ১০ টা ৫৫ নাগাদ অবরোধ ওঠে। যাত্রীদের অভিযোগ খতিয়ে দেখার আশ্বাস দিয়েছেন রেল কর্তৃপক্ষ।

রেশন বন্টন দুর্নীতির তদন্তে ইডি, রাজ্যের প্রাক্তন মন্ত্রী, জেলবন্দী জ্যোতিপ্রিয় মল্লিকের ঘনিষ্ঠ আব্দুল বারিক বিশ্বাসকে আগামী শুক্রবার জিজ্ঞাসাবাদের জন্য সিজিও কমপ্লেক্সে তলব করেছে।

গতকাল ভোর থেকে দেগঙ্গা, বারাসাত, বসিরহাট, রাজারহাট, ভাঙ্গড় এলাকায় ইডি আধিকারিকরা ২১ ঘন্টার বেশি তল্লাশী চালান। এর মধ্যে ছিল আবদুল বারিকের বাড়ি, রাজারহাটের দুটি ফ্ল্যাট,চালকল, তার কয়েকজন ঘনিষ্ঠর বাড়ি, চালকল, আটাকল ইত্যাদি। আব্দুল বারিকের রাজারহাটের ফ্ল্যাট থেকে কুড়ি লক্ষ টাকা ও গুরুত্বপূর্ণ নথিপত্র উদ্ধার হয়েছে।

দেগঙ্গায় আবদুল বারিকের ঘনিষ্ঠ আলিফ নুরের বাড়ি এবং চালকলেও তল্লাশি চালানো হয়।

আগামীকাল তাকে এবং দেগঙ্গা পঞ্চায়েত সমিতির সহ সভাপতি, জেলবন্দী বাকিবুর রহমানের ভাইপো আনিসুর রহমানকে সিজিও কমপ্লেক্সে তলব করেছে ইডি।

পশ্চিম বর্ধমানের দুর্গাপুরের বিধাননগরে নতুন তৈরি জলের রিজার্ভার থেকে পাটা খুলতে গিয়ে বিসাক্ত গ্যাসে দুজনের মৃত্যু হয়েছে।

জানা গেছে, বছর ৫৫-র রাজমিস্ত্রী হুমায়ুন শেখ এবং আরও কয়েকজন আজ ঢালাইয়ের পাটা খুলতে আসেন। প্রথমে একজন নামার পরেই জ্ঞান হারান। এরপর রাজমিস্ত্রী হুমায়ুন শেখ নীচে নামেন। তিনিও সংজ্ঞাহীন হয়ে পড়লে প্রতিবেশীরা পুলিশে খবর দেন। পুলিশ এবং দমকল কর্মীরা তাদের উদ্ধার করে

বিধাননগরের একটি বেসরকারি হাসপাতালে নিয়ে গেলে দুজনকেই মৃত ঘোষণা করা হয়।

গাঙ্গেয় পশ্চিমবঙ্গ ও তার পার্শ্ববর্তী এলাকায় সৃষ্ট ঘূর্ণাবর্ত এবং মৌসুমী অক্ষরেখার প্রভাবে কলকাতা সহ দক্ষিণবঙ্গের বিভিন্ন জেলায় বৃষ্টি হচ্ছে।

দোসরা আগস্ট পর্যন্ত হালকা থেকে মাঝারি বৃষ্টির পূর্বাভাস দিয়েছে আবহাওয়া দপ্তর। শনি এবং রবিবারও অনেক জায়গায় বৃষ্টি হবে।

আগামীকাল ভারি থেকে অতিভারি বৃষ্টির কমলা সতর্কতা জারি থাকছে হুগলি, পূর্ব বর্ধমান এবং পশ্চিম মেদিনীপুর জেলায়। অন্যান্য জেলাতেও ভারি বৃষ্টির সম্ভাবনা। শুক্রবার পশ্চিম বর্ধমান, বীরভূম, পুরুলিয়া ও মুর্শিদাবাদ জেলায় ভারি বৃষ্টি হতে পারে।

উত্তরবঙ্গের জেলাগুলিতেও চৌঠা আগস্ট পর্যন্ত ভারি বৃষ্টির সতর্কতা জারি করা হয়েছে।

ভারতীয় ক্রিকেট দলের প্রাক্তন অধিনায়ক সৌরভ গাঙ্গুলিকে আগামীকাল ইস্টবেঙ্গল ক্লাব ভারত গৌরব সম্মান প্রদান করবে। ক্লাবের ১০৫তম প্রতিষ্ঠা দিবস উপলক্ষ্যে এই সম্মান সৌরভের হাতে তুলে দেওয়া হবে। ভারতের পেস বোলার মহম্মদ শামিকেও দেওয়া হবে বাংলার গৌরব সম্মান। দুই প্রাক্তন ফুটবলার রঞ্জিত মুখার্জী ও প্রশান্ত ব্যানার্জী পাচ্ছেন জীবনকৃতি পুরস্কার। বর্ষসেরা ফুটবলার নির্বাচিত হয়েছেন নন্দকুমার সেকার। উদীয়মান খেলোয়াড় হিসেবে প্রভু সুকান্ত সিং গিলকে পুরস্কার দেওয়া হবে। বছরের সেরা ক্রিকেটারের পুরস্কার পাচ্ছেন সাত্ত্বিকি দত্ত। স্কুদিরাম অনুশীলন কেন্দ্রে এক অনুষ্ঠানে ক্রীড়ামন্ত্রী অরুণ বিশ্বাস বহু বিশিষ্ট প্রাক্তন ও বর্তমান ক্রীড়াবিদরা এখানে উপস্থিত থাকবেন।

ডুরান্ড কাপ ফুটবলে আজ যুবভারতী ক্রীড়াঙ্গনে ব্যাঙ্গালুরু এফ সি, ইন্ডিয়ান নেভির মুখোমুখি হয়েছে। বিরতিতে ব্যাঙ্গালুরু ২-০ গোলে এগিয়ে আছে। গোল করেছেন রাহুল ভেকে ও সুনীল ছেত্রী।
